

休邑隆阜戴



堂二十世孫起端

謹識

重續譜叙



家之有乘則知其本木水源之所自疎者以之而親渙者以之而合是故繁族不可以無乘也然欲歸萬殊於一本非乘曷能以傳耶苟生於前者以開其源生於後者不濬其流抑何怪其昧乎本源而相視如路人也吾祖得一公昂霄公齋道公悟其故因將世系有可攷者註為族譜俾共明本始忘昭穆別親疎

以著先祖世德行實之槩示有所勸懲也其用心可謂勤矣後以兵革之變居廬家錄遭燬世次失紀或有認非族而謁子儀之墓者貽哂于大方或不念其族而撻劉叟者見誚於當時其敦本親族之義何在焉持中以此而常有懼也特泝軒轅氏之所自出若未得其詳者不敢傳會以質疑摛爲外紀正猶先世之家錄得其實而已庶不如細人之昧所出而玷於先歟間嘗每考已知世系

行實註爲宗塋圖畧以申敬宗保墓之意自捐貲梓傳于後但族譜脩而未備於是累歷寒暑殫力詳審以續脩之其或若有失畧異同志者繼焉未識以爲何如况吾祖與君祖有斯文好敢請釐正之爲弁諸首願不固讓余敬閱之起拜之曰子賢乎哉夫宗塋圖之作家譜之續任匪易矣信非克肖者其能念古宗法之遺意夙夜孜孜重脩譜牒而啓來昆乎今子知其所重而增廣之則上

不失其本之有自而下又見其末之相
承踈由此而不睽渙由此而不散子之
孝思抑不慙于范希文公之敦族蘇老
泉之重本至於風俗之厚教化之美昇
平之躋夫豈外子之用意邪余聞君子
樂成人之美于是著之亦以彌縫使其
淳也觀者慎毋忽諸

嘉靖二十一年歲次壬寅秋九月吉日

賜進士出身資政大夫南京兵部左侍郎

前提督操江都御史邵人 潘珍 書

戴氏紀源

戴本高辛氏之後封於商歷世
十四而伐桀有天下都于亳又
十三世而生帝乙封啓以子爵
爲微國及紂無道周武王滅之
封其庶兄微子啓于宋武庚以
殷叛成王殺武庚建微子爲上
公統承先王七世至戴公仁而

愛民曰戴子武公爲司空生宣
公遂以戴爲姓焉寶公之後係
爲戴氏迭爲鄉大夫已有十七
世矣周之末年國爲齊滅而公
猶居故國降自秦漢罷諸侯置
守令子孫宦遊南北散處四方
焉

戴公像

官為鄉大夫



寶 公 像



德公像

官信都太守



聖公像

官為博仕



賢公像

官五經博仕



澤公像

官襄州刺史



像公憑

官五右博仕



遵公像

官曰大豪戴子高



良公像

東漢逸民



封公像

官拜義郎再遷山相



達公像

以琴自娛



碩公像

隱居



法 興 公 像

好孝
初任尚書



像公祿

翰林
李仕大夫



仕唐太宗大理火鄉

像公冑

後遷尚書左相後遷僕射



至德公像

西臺侍郎後遷左僕射



至聖公像

官任廣州教授



至達公像

官任并州刺史



謂公像

官至光祿大夫



舒公像

何東太守



護公像

官為兵馬使



壽公像

護公之子

官為建威指揮



安公像

壽公之子

銀青光祿大夫



刻

奢公像

安公之子

始居隆阜



休寧隆阜戴氏開源序

按唐貞觀十二年唐太



宗命吏部尚書高

士庶黃門侍郎常挺禮部侍郎令狐德棻

中書侍郎岑文本撰姓氏族誌編天下譜

諜質諸古史考其真偽辨其昭穆等其甲

乙褒進忠良貶退奸逆宜以今朝品秩定

其高下皇族為尊外戚次之分為九等毋

拘舊門世祿而輕朕官爵以徇流俗之情

可釐正訛謬舍名取實定姓分族頒行天

下右僕射中書門下三品臣戴至德言聖

德開宏舉萬世不傳之緒至德千載有幸
承敕定天下之氏族品量士庶之貴賤宇
宙一家四海一族臣謹按晉咸寧二年三
月武帝詔曰朕以不德君臨天下務在涵
育生靈上承

昊天之命下述帝王之軌若不品量貴賤
則蘭艾混同可普告九州一百二十郡悉
賫歷代以來各姓氏譜狀上投秘閣更爲
四海士民定其譜牒咸共奏聞秘書丞戴
尚義具先世譜系上聞其言曰戴本高辛

氏之後帝嚳次妃有娥氏女簡狄祈禱有
 玄鳥之祥而生契舜使為司徒教民有功
 賜姓子氏封於商歷世十四而伐桀有天
 下都于亳又十三世而生帝乙帝乙三子
 長啓次仲衍三受德受德以嫡立封啓以
 子爵于微國及紂無道周武王滅之立其
 子武庚於殷之故墟封其庶兄微子啓于
 宋其地在禹貢徐州泗濱西及豫州盟楮
 之野厥後武庚以殷叛成王殺武庚微子
 啓為上公尹茲東夏統承先王修其禮樂

作賓王家七世至戴公仁而愛民古謚法
以萬民所仰曰戴子武公司空生宣公初
以王父謚為氏遂以戴為姓焉將薨舍其
子與夷而立其弟和是為穆公穆公之後
以穆為氏繼氏相承以主社稷寶公之後
系為戴氏迭為卿大夫至盈之不勝距戴
公已有十七世矣周之末年國為齊滅而
公猶居故國降自秦漢罷諸侯置守令子
孫宦遊南北散處四方臣八世祖仕漢為
侍中子恢刺潤州遂居焉臣之世族其旨

如斯臣至德切謂天下姓氏大率起自軒
轅歷代以來自源及流本同一體溯流求
源必歸于一臣之氏族按秘閣戴尚義所
進譜牒質諸古史若合符節世系源流昭
然可攷臣承漢信都太傅德之後世居魏
郡斥丘他如居吳居楚或顯或微殆不可
計咸能以清白著聞然欲稽其昭穆之詳
實以典籍煨燼斷爛之餘傳記纂修不出
一手未免訛謬不敢欺冒謹陳梗槩以聞
右知譜局事吏部尚書臣士廉黃門侍郎

臣挺禮部侍郎德彛中書侍郎文本謹考
戴氏實始於宋開源不二計代無差至德
所言誠有所據本朝至德世系父胄仕至
中書僕射至德亦授門下三品今臣等按
知戴之爲宗舊門世祿素號儒雅本朝名
宦亦著忠清實爲丙姓可謂胄族者矣
景定三年歲在壬戌仲冬吉日

裔孫

進士元凱

敬錄

戴氏源流行實

戴氏之先出自子姓爲殷之後宋戴之封因以謚著姓焉西漢時有德字延君兄之子戴聖字次君同受禮於右蒼德刪禮記爲八十五篇號大戴禮聖又刪爲四十九篇號小戴禮德爲信都太傅聖以博士論石渠德以授徐良聖以授橋仁榮顯家世傳業憑字次仲習京氏易漢建武中正旦朝賀上令能說經者相詰難其不通者輒奪其席以與通者憑遂重五十餘席京師語曰解經不窮戴侍中

惟良字叔鸞東漢逸民也才高倨傲議論尚
竒我獨步天下誰與爲偶入江夏山中優游
不仕父遵字子高多財好施食客常三四百
人語曰閔中大豪戴子高封字平仲東漢對
賢良策第一拜議郎遷西華令蝗不入界歲
旱積薪自焚火起而雨遷中山相逵字安道
常以琴書自娛太宰武陵王晞聞其能琴遣
人召之逵對使者破琴曰戴安道不能爲王
門伶人晉大康中累徵不至二子勃顯隱居
不仕並有高名碩子會稽人家貧三子延壽

延興法興並能脩立山陰有陳戴者家富積
錢三千萬鄉人云戴家三兒敵陳戴三千萬
錢法興好學初爲尚書令史彭城王於尚書
中覓了了令史得法興以爲記室宋武郎位
以爲南臺侍御史兼中書通事舍人甚見親
待門外成市家累千金祿爲翰林學士三子
胄唐初爲秦王府叅軍後大理少卿缺太宗
曰胄清直人也參處法意至析秋毫言若湧
泉上益重之遷尚書左丞三子至德至聖至
達至德唐乾封中除西臺侍郎又遷僕射至

聖爲廣州教授至達爲并州刺史父子相繼
世詔其榮洪每得密友書于編簡號金蘭簿
嵩每畫有截閤牛者以錦囊繫肘自隨松十
歲能誦書述與弟迅俱以文學稱復古字式
之號石屏有詩行世隨嬾庵姚雪蓬爲選文
謂其敏才號東臯子亦工於詩茲焉修其譜
系圖其真像故撮其槩以示後人使爲子孫
者不可不知其源流亦不可不知其祖烈詩
曰無念爾祖聿修厥德此之謂也於是乎書

御祭胄公文

皇帝遣人材黃義銜祭廣州
左衛指揮僉事戴胄之靈
曰惟尔累從征伐多著勤
勞惠撫諸軍咸能奮勇於
是授以前職加爾功勲保
障一方軍民寧謐可無忝

矣今胡虜悉平四夷賓服
正宜與尔共享
太平夫何一疾遽終於外
訃音來聞不勝嗟悼今特
遣人祭以牲醴尔宜有灵
復思喻祭

護公差牒

勅都團練觀察處置使牒先鋒突將都押衙
第十將戴護

牒奉處分前件官早推忠赤久著勲勞實
深獎用之情特舉陞遷之典俾居重職更
俟立功始終不渝甄疇豈後事須收捕散
押衙克先鋒突將都散員兵馬使牒知者
故牒

天祐元年八月五日牒

使檢校太尉陶押

報帖

報戴護等冬寒好在彼防捕探知土賊余
公美驅脅百姓結構謀惡今使司已發兵
馬及軍前差指揮使張洪等部領兵馬取
衢州白沙路徑往襲逐掩殺次仰戴護等
各檢點人戶援護家屬如有同惡者及賊
首指揮將文字來扇惑便仰設計掩捉送
來當與優賞仍更差人往彼探訪徒伴行
止旋隨舟中來報遣此不具
權勾當團練公事陶押委付戴護等

天祐二年十一月十八日

又

報戴護俞陳等春寒須各謹捕前者汪彖
寺扇動鄉里輒恣干戈百姓寺皆被脅從
亦非情願今使司繼有榜帖相次招携切
在向公無更生事昨方恩方岌殺戮余知
礼使司特加重職兼免差徭切恐汪彖朋
黨各在彼處山野蔽伏委戴護長加報探
共勦元兇賞罰已有榜條功勞更爲申薦

特立勞効切在此時遣此不具
防邊使知鎮事檢校刑部尚書汪押委付
戴護等

天祐三年正月五日

戴虞候護傳

戴虞候護者其先自袁州宜春徙新安至護始居婺源鳳亭里性剛果有武力值巢賊亂後草竊蠡起護倡義與鄉人團結自守會揚行密都督東南行營以陶雅鎮歙州汪武鎮婺源雅聞護名薦補先鋒突將都押衙兵馬使時土賊余公美作亂雅遣指揮使張洪等自衢州白沙鎮進討命護佐之公美就擒進補廂虞候已而汪彖余知禮以次嘯聚武檄護率所部掩擊之護

戮其渠魁釋其脅從一鄉晏然時天祐三年也護尋卒雅表其子壽代領其衆吳順義中官至婺源左建威指揮第二將卒徐知訓復表其子安為右軍衙前總管克饒州左豹捷指揮第一都虞候安守饒甚有威惠南唐保大中官至銀青光祿大夫檢校國子祭酒監察御史上柱國卒于饒州詔葬樂平榔櫨山土人感德立祠祀之子孫居婺源桂巖及休寧隆阜甚盛

壽公

誥命

勅鎮海寧國等軍節度使諸道都統戴壽
 前充婺源左建威指揮第二將十將戴壽
 蓋嘗救民於塗炭之中拯溺於水火之際
 出將使指揮嘉譽甚孚奉公恤民頗見悉
 力可特授武翼郎中書舍人

順義六年三月一日誥

壽公差牒

勅鎮海寧國等軍節度使諸道都統牒戴壽
牒奉處分前件人素稱壯勇久著忠貞咸
蘊義以思伸盡飭躬而待用今則特於行
伍補署職名事須補散將差克婆源左建
威指揮第五第二將十將牒知者故牒

吳順義六年四月

日牒

使守太師中書令東海王押

安公

勅牒

勅右軍衙前總管克饒州左豹捷指揮第一
都都虞候申報本都公事戴安早由武幹
俾列轅門累換歲華頗聞勞績宜伸朝獎
式尔旌疇可授銀青光祿大夫檢校國子
祭酒兼監察御史上柱國餘如故牒

保大五年三月 日

使守太師中書令東海王押

太尉中書令齊王臣 景遂

中書侍御平章事 馮延巳

駕部員外郎權知制誥陳喬行

銀青

誥詞

勅右軍衙前總管克饒州左豹捷指揮第一
都虞候申報本都公事銀青光祿大夫檢
校國子祭酒兼監察御史上柱國戴安選
自朝倫詔守饒郡迺能夙夜在公慎脩厥
德正宜褒寵遽尔歸歿朕甚憫焉可追謚

忠恭公葬樂平之榔嶺山立祀奉典百官
有司奉敬致祭以示來者

保大七年三月

日

侍中燕王

景達

左僕射兼門下侍郎平章事建勳

給事中

太尉錄尚書事齊王

兵部尚書事

渾

兵部侍郎

覺

兵部侍郎

貽業

尚書右丞闕

駕部員外郎

判押

主事

蔣蒙

令史

劉仁謙

書令史

潘弼

勅如右符到奉行

忠恭公廟碑記

公諱安行寧叔字適之故武政大夫護之孫武翼
郎中書舍人壽之子生而穎悟龍鳳之姿鷲鵠其
峙金聲玉色彌久彌彰善屬文禮賢士好馳馬試
劔勇於敢為魁傑人也仕南唐充饒州左豹捷指
揮第一都虞候累著勲績加授銀青光祿大夫檢
校國子祭酒兼監察御史上柱國公之守饒奉止
以敬御衆以寬明天理察人心厚彞倫美教化移
風易俗博德崇禮寇不侵疆蝗不入境民自矜奮
且曰茲上天惠仁侯莫不化服凡令一出民懽趨

之無有後先野無遺賢官無貪私嫁娶葬埋各有
常法令無失時出相第長入相慈孝城郭巷道治
之如故民亦悅服侯亦切喜侯期年遂終於饒有
司上其事

朝廷震悼以其才兼文武威德並流追謚忠恭公
勅葬樂平之柳栢山立祠廟食厥邦余來自

京師徵余記其事於不朽余謂公一家三世兩仕歷
三朝至於公生能致君澤民死能保安茲土可謂靈
也已矣其先顯備矣因以記之

保大癸卯秋仲知貢進士李克徵撰


休寧隆阜戴氏審坑寺祭田記

古之廟祭悉矣自宗法不修人無以相統孝敬之所寓者不得盡於家且慶賞之澤於功德之報稱或未滿焉於是乎有以道業而祭諸孝者愛利而祭諸民者迨夫佛老之興則又有以檀施而祭諸其宮者事雖不古而人心之不可泯者於此乎壙墓之間枯草之霜榮木之雨掃除奠酌少長咸在有更代什伯而無改又於二氏之我祠者而圖報之於未久非仁孝誠敬之所萃而人道傳統之重彰彰於此乎以為有人心者宜於此焉變而孝士

大夫之家以義起禮不容已矣余友戴君蘭庭芳之高祖妣府錄夫人塋審坑佛庵後庭芳妣汪氏塋寺左係養字九寺號山二分五厘族之人念香火之奉與寺相為永久而吾歲時贈遺其僧徒者無恒且莫之均齊也乃相率買田畀之鑄石而徵文焉故余首發斯義而為之記曰府錄府君姓戴氏諱得一世居徽休寧由山鄉夫人程氏黎陽鄉率溪口世家也善相府君以教子睦族成其家政享年五十有九塋其鄉審坑之源距壬挹丙山立曲盤原泉泓渟雅有思致其長子較院君諱杼次

掌書君諱櫓三運幹君諱拱貲產恢裕以仁其里
夫人慈訓所致也其長孫諱元凱以寶祐癸丑登
第仕至池州帥司幹官諸孫之後皆以文孝行義
稱其玄孫庭芳之子琥中淞江行省鄉試今分教
句容戴氏之澤未艾也審坑寺檀施之祠府錄夫
人在焉今買田以資其祠祭者庭芳與其從弟長
將所禮兄弟之子積慶先祖瞻祖田在歙縣二十
五都延祐經理吳吉甫戶業璧字二千三百六十
九號夏田一段今寺住僧玉也

龍集至正歲在癸巳仲秋里人朱升記



新溪戴氏宗祠記

吾徽之有戴氏也始自南唐銀青光祿大夫國子祭酒忠恭先是寶大間以本官來刺歙夫人庶氏之卒也遂於歙之篁墩小練源而窆冢子奢惟是不忍釋太因家今休寧之隆阜厥後支繁派別遂望於徽洪武初有曰齋道者又自隆阜北渡河三里許而居新屯是爲新溪戴氏歷三傳曰孟善謹禮君子也始於室寢之東創葺祠宇而妥先靈以龕歲時則恪遵家禮而有事焉至

皇上改元聚族益衍展敬脩睦隘莫可容於是孟善之四世曰輝諭諸伯子如切尚齋而博謀于群

從周仁攷等曰祠宇弗稱尊祖睦族之行何以歲
事更新之圖誠不可但已惟是群謀之僉同也乃
拓土刪蕪布絕而相經始負丑向未爲廳事五間
中祀忠恭以爲鼻祖奢附於左家隆阜也帝道附
於右遷新屯也左一間以祀宗之先達而孟善在
焉右一間以祀婦之有節而孫氏在焉兩末則左
以藏籩俎右以列饗饍前三間爲廟門左右各三
間則爲兩廡百堵具興而倭迴則繚之垣以甃其
地卽齋道二世繼宗丘墓之陰也竣事每元日及
春秋二仲則合齋道之族相與駿奔祠下裸將有
嚴昭睦相峙繫之以宗而有別俎豆森列綴之以

食而弗殊且著爲令而係之籍以詔有永使祀事
輪供弛備而弗虔者罰有常禮儀必度酖譁而弗
恪者衆共斥素履無咎行裂而辱先者黜無赦百
禮攸洽十倫以叙而族潢君子之風始赫然改觀
於百年之舊矣閱四歲輝之子孔仁以是役也寔
佑啓後人不可以無紀而且以嘗在余硯席乃負
狀以請余惟大夫以上得立不遷之廟以祀其始
封古灋也自封建之制廢大小宗之灋不立身爲
鄉輔而再世之後埒於庶人是以有生陟華要死
不數世而無盈丈之宮以歆薄饗顧不閔斯雖宋
制惟太子少傳以上例得立廟而後伊川亦嘗立

之以祀大中屬續又遺命立宗以屬厥子則夫先
世有功德以躋碩顯而後人尋大宗之泐創爲不
遷之祠以祀之世豈非事以義興而號爲得禮
然則是舉也非輝之強力卓識以大振夫詩書禮
義之澤而克念厥紹其能以有成歟余不學重違
其請也爰續其事而爲之記若祠之肇工則嘉靖
乙未訖工則戊戌而費出有差則他石可考也茲
不復贅云

嘉靖癸卯歲秋八月朔日

衡水縣儒學訓導邑人珠溪程珖撰

